

Statût de Union Teritoriâl Intercomunâl dal Nadison

TITUL I NORMIS GJENERÂLS

Art. 1

Istituzion e denominazion de Union Teritoriâl Intercomunâl dal Nadison

1. Metint in vore la Leç Regjonâl FVG dai 12 di Dicembar dal 2014, n. 26 cun ogjet il riordin dal sisteme Regjon - Autonomiis locâls dal Friûl Vignesie Julie, l'ordenament des Unions teritoriâls intercomunâls e la redistribuzion des funzions amministrativis (di ca indenant clamade LR FVG 26/2014) e par ce che al è compatibil, dal art. 32 dal Test Unic sul ordenament dai Ents Locâi e s.m.i., di ca indenant clamât "TUEL", si è costituide in date la Union clamade "Union Teritoriâl Intercomunâl dal Nadison" (di ca indenant clamade Union o UTI dal Nadison) cu la partecipazion dai Comuns de Regjon FVG culi indicâts: Buri (Buttrio), Cividât (Cividale del Friuli, Čedad), Cuar di Rosacis (Corno di Rosazzo), Drencje (Drenchia, Dreka), Grimac (Grimacco, Grmak), Manzan (Manzano), Muimans (Moimacco), Premariâs (Premariacco), Prepot (Prepotto, Prapotno), Pulfar (Pulfero, Podbunjesac), Remanzâs (Remanzacco), Sant Zuan dal Nadison (San Giovanni al Natisone), Sant Lenart (San Leonardo, Svet Lienart), S. Pieri dai Sclavons (San Pietro al Natisone, Špietar), Savogne (Savogna, Sauodnja), Stregne (Stregna, Srednje), Torean (Torreano, Tavorjana).
2. La Union Teritoriâl Intercomunâl dal Nadison e je un Ent Locâl, cun personalitât juridiche, che al à nature di union di Comuns, istituît de normative regjonâl in vore, pal exercizi coordinât di funzions e servizis comunâi, sorecomunâi e di aree vaste, e ancje pal svilup teritoriâl, economic e sociâl, daûr di ce che al è previodût dai articui che a vegnin.
3. La Union e à autonomie statutarie e regolamentâr daûr des modalitâts stabilidis de normative regjonâl in vore, e a cheste si aplichin i principis previodûts pal ordenament dai ents locâi e, se compatibilis, lis previsions dal articul 32 dal TUEL.
4. L'ambit teritoriâl de Union al coincît cun chel dai Comuns che le costituissin.
5. Al è istituît il Subambit "Valadis dal Nadison" che al cjape dentri i Comuns di Drencje, Grimac, Pulfar, Sant Lenart, S. Pieri dai Sclavons, Savogne, Stregne.
6. Par une miôr organizazion dal exercizi associât di funzions e servizis la Assemblee e pues cun proprie deliberazion istituî altris Subambits.
7. Cuntun Regolament al vagnarà disciplinât il funzionament dai Subambits.
8. A ogni Subambit e je preponude une Conference dai Sindics dal Subambit cuntun rûl propositîf e

consultîf pe formazion dai indreçaments e des sieltis de Union. In relazion aes funzions e ai servizis esercitâts tal teritori di riferiment, i orghins de Union a motivin in maniere adeguate il mancjât recepiment des propuestis e dai parês palesâts de Conference dai Sindics dal Subambit.

Art. 2

Sedis

1. La Union e à sede legâl e aministrative a Cividât.
2. Intal ambit dal teritori dai Comuns che a aderissin, a puedin ancje jessi costituîts sedis e uficis distacâts, ancje intes singulis sedis comunâls.
3. I orghins de Union a puedin riunîsi e operâ ancje in lûcs diviers de proprie sede, baste che a sedin comprendûts intal ambit dal teritori de Union stesse.

Art. 3

Elements rappresentatîfs de Union

1. La Union si identifice cun chescj elements:
 - a) la denominazion uficiâl di “Union Teritoriâl Intercomunâl dal Nadison”, in alternative si pues doprâ la denominazion corinte “Union dal Nadison” o ben “U.T.I. dal Nadison”;
 - b) il so logo identificatîf;
 - c) il steme di doprâ su la cjarte intestade de Union e sui altris documents de Union, che al rapresente il non de Union cun dongje il logo.
2. Il Confenon al ripuarte il steme istituzionâl de Union. L’ûs dal confenon al è consintût daspò che al sarà autorizât di bande dal President de Union, intai tiermins previodûts dal regolament.
3. La riproduzion e l’ûs dal non, dal logo identificatîf e dal steme de Union a son autorizâts dal President, sintût l’Ufici di Presidence de Union.

Art. 4

Finalitâts

1. La Union e je costituide cul fin di esercitâ in maniere coordinade funzions e servizis di competence dai Comuns che a aderissin, sorecomunâi e di aree vaste, e ancje cul fin di atuâ il svilup teritoriâl, economic e sociâl, perseguint finalitâts di eficiencie e eficacie. Par chestis finalitâts la Union e rapresente l’ambit otimâl individuât de normative regjonâl, ancje in atuazion dai principis di sussidiarietât, di idoneitât e diferenziazion.
2. La Union si pon ancje la finalitât strategjiche di perseguî obietîfs di:

- a) pârș oportunitâts par garantî a ducj i citadins de aree i stes dirits di acès ai servizis;
- b) eficience e contigniment dai coscj, otimizant il rapuart tra i coscj stes e la cualitât dal servizi, a mieç di economiis di scjale che a derivin dal ûs integrât dai fatôrs di produzion internis e esternis al ent, in direzion di une riduzion tendenziâl dai coscj;
- c) eficacie (aumentâ la specializazion dai impleâts par un miôr servizi al public) e plui cualitât dai servizis;
- d) svilup di politichis integradis unitariis, par impleâ miôr che si pues lis vocazions e lis potenzialitâts di ogni teritori, cirint di armonizâ i regolaments;
- e) promovî iniziativis par garantî il mantigniment e la difusion dai servizis di prossimitât, conservant i principis e i istitûts che a atuin il Servizi Sociâl dai Comuns;
- f) valorizazion des risorsis umanis dal personâl dependent ancje creant sinergjiis cun realtâts esternis publichis-privadis;
- g) il svilup de cooperazion transfrontaliere/transnazionâl;
- h) la Union, intal ambit teritoriâl indicât tal articul 4 de Leç dai 23 di Fevrâr dal 2001, n.38, e garantî i dirits previodûts de legjislazion in vore in materie di tutele de minorance linguistiche slovene e, in particolâr dai articui 8, 9, 10 e 21 de stesse leç;
- i) la Union e garantî la atuazion des disposizions de Leç dai 15 di Dicembar dal 1999, n.482 su lis "Normis di tutele des minorancis linguistichis storichis".

Art. 5

Funzions esercitadis de Union

1. La Union e esercite:
 - a) lis funzions comunâls indicadis tai seguitîfs articui 6 e 7;
 - b) lis altris funzions delegadis in maniere volontarie ae Union di bande dai Comuns che a fasin part o ben di altris ents publicis;
 - c) lis funzions provinciâls trasferidis cun leç regjonâl ai Comuns pal exercizi obligatori in forme asociade;
 - d) lis funzions za esercitadis de Comunitât Montane de Tor, Nadison e Cuei;
 - e) lis funzions regjonâls trasferidis o delegadis cun leç regjonâl ai Comuns pal exercizi obligatori in forme asociade.
2. In relacion a lis funzions indicadis tal come 1, a la Union a spietin lis jentradis che a vegnin di tassîs, tarifis e contribûts sui servizis a cheste afidâts.
3. La Union e exercite lis ativitâts relativis ai sistemis informatîfs e a lis tecnologjiis de informazion e de comunicazion che a coventin pal exercizi des funzions e dai servizis indicâts in chest articul, daûr des modalitâts indicadis tal articul 6, come 2.

Art.6

Funzions comunâls esercitadis de Union

1. I Comuns che a aderissin a esercitin in forme associate, a mieç de Union, lis funzions comunâls in cheste maniere:
 - tacant dal Prin di ZENÂR dal 2016:
 - 1) sisteme locâl dai servizis sociâi come tal articul 10 de Leç Regjonâl dai 31 di Març dal 2006, n.6 (Sisteme integrât di intervents e servizis pe promozion e tutele dai dirits di citadinance sociâl), dut cês mantignint la discipline de forme associate dal Servizi Sociâl dai Comuns come tai articui dal 17 al 21 de Leç Regjonâl n.6/2006;
 - 2) catastic, gjavant lis funzions che a restin al Stât daûr de normative in vore;
 - 3) planificazion de protezion civîl e coordinament dai prins socors;
 - 4) statistiche;
 - 5) elaborazion e presentazion di progjets a finanziament european;
 - tacant dal Prin di ZENÂR dal 2017:
 - 6) polizie locâl e polizie amministrative locâl;
 - 7) ativitâts produtivis, comprendût ancje il Sportel Unic;
 - 8) edilizie scolastiche e servizis scolastics;
 - tacant dal Prin di ZENÂR dal 2018:
 - 9) gjestion dal personâl e coordinament de organizazion gjenerâl de amministrazion e de ativitât di control;
 - 10) programazion e planificazion teritoriâl di nivel sorecomunâl;
 - 11) gjestion dai servizis tributaris.
2. I Comuns che a aderissin a esercitin in forme associate ancje lis ativitâts relativis ai sistemis informatîfs e a lis tecnologjiis de informazion e de comunicazion che a coventin pal esercizi des funzions e dai servizis indicâts tal articul 5 di chest Statût e a condividin, par chest fin, i imprescj tecnics e informatics, lis rêts, lis bancjîs dâts e i programs informatics a lôr disposizion.
3. Ai orghins de Union a tocjin lis decisions che a rivuardin lis funzions indicadis in chest articul cun lis modalitâts e intai tiermins previodûts dal Statût.

Art.7

Funzions comunâls gjestidis avalintsi de Union

1. I Comuns che a aderissin a esercitin in forme associate, avalintsi dai uficis de Union, lis funzions comunâls in cheste maniere:
 - tacant dal Prin di ZENÂR dal 2016:

- 1) programazion e gjestion dai dibisugns di bens e servizis in relacion a lis ativitàs de centrâl uniche di comitence;
 - 2) servizis finanziariis e contabii, control di gjestion;
- tacant dal Prin di ZENÂR dal 2017:
- 3) proceduris di autorizazion in materie di energjie;
 - 4) organizazion dai servizis publics di interès economic gjenerâl;
- tacant dal Prin di ZENÂR dal 2018:
- 5) oparis publichis e proceduris di espropri;
 - 6) planificazion teritoriâl comunâl e edilizie private.
2. I orghins dai Comuns che a aderissin a la Union a mantegnin la competence di cjapâ lis decisions che a rivuardin lis funzions indicadis in chest articul.

Art. 8

Deleghe di funzions comunâls ae Union

1. I Comuns a puedin delegâ ae Union altris funzions pal exercizi in forme associate in plui rispiet a chês previodudis tai articui 6 e 7.

Art. 9

Standard comuns di funzionament dai servizis

1. La Union e individue tant che obietf strategjic di medi periodi l'otigniment di un nivel omogjeni dai servizis tal so teritori, se pûr su la cjarte variabil drenti di un interval contignût e prestabilît, daûr di specificitâts teritoriâls e situacions storichis consolidadis, cul fin di rivâ a vê une cundizion di pâr oportunitât e tratament pai citadins residents tal teritori de Union.
2. Tal percors inte direzion indicate tal come 1, e reste la facultât par ogni ent che al aderis di previodi e domandâ a la Union standard di servizi superiôrs al nivel comun decidût e aplicât, dant a la Union steshe lis risorsis che a coventin in plui su la fonde de cuantificazion fate dai orghins tecnicos.

Art. 10

Rapuarts cui Ents che a aderissin

1. La Union e ricognòs tal colegament cui Comuns che a aderissin un element strategjic pe sô plene funzionalitât e pe realizazion di une azion amministrative coordenate e sinergjiche su dut il teritori.

2. In plui di ce che al è previodût di chest Statût, la informazion e i colegaments tra i Comuns che a aderissin e i orghins de Union a son sigurâts dal davuelziment di une funzion specifiche di colegament e coordinament atribuide al Uffici di Presidence de Union.
3. Lis comunicazions tra i ents che a aderissin che a rivuardin lis ativitâts de Union – informazions, comunicazions, domandis di dâts e gnovis e altri – a vegnin fatiss, di regule, par vie telematiche.

Art. 11

Durade, recès e dissioziment

1. La Union e à durade a timp indeterminât.
2. I Comuns cuntune popolazion di plui di 5.000 abitants e chei cuntune popolazion di plui di 3.000 abitants se a apartegnin o a son apartignûts ae Comunitât Montane a puedin recedi de Union dopo dîs agns de adesion cun deliberazion aprovade dal Consei comunâl, tignint cont di ce che al è stabilît dal articul 6, come 3 bis de L.R. 26/2014.
3. Il recès al tache dal Prin di Zenâr dal secont an dopo di chel là che e je stade cjapade la deliberazion indicade tal come 2.
4. Il recès de Union di un o plui Comuns che a aderissin nol determine il dissioziment di cheste, che e reste in vite fintremai che i Comuns che le componin a son almanco doi.
5. Tal câs di recès de Union di duj i Comuns infûr di un, la Assemblee e delibere il dissioziment intai tiermins indicâts tal articul 15.

Art. 12

Recès de Union di un o plui Comuns

1. Ogni Comun che al partecipe ae Union che al vedi une popolazion di plui di 5.000 abitants e chei cuntune popolazion di plui di 3.000 abitants se a apartegnin o a son apartignûts ae Comunitât Montane a puedin recedi in maniere unilaterâl, daûr de normative regionâl in vore, dopo 10 agns de costituzion de Union, cu la adozion di un at dal Consei.
2. Tal câs di recès il personâl comandât, distacât o trasferît ae Union di bande di chel singul Comun al torne te dotazion organiche dal Comun stes. La Union e pues demandâ il mantigniment intal so organic dal personâl interessât, daspò di une deliberazion dal Uffici di Presidence de Union. Se la procedure di recès e je stade ativade di plui di un ent, ancje no tal stes moment, la Union e à facultât di demandâ la ricolocazion di une cuote dal personâl in câs cjapât a vore in maniere direte de Union, intai Comuns che a recedin, in proporzion al personâl cjapât a vore tal complês e a lis cuotis di partecipazion dai ents in fase di recès. E je mantignude une eventuâl discipline diverse di leç e/o di contrat di lavôr.

Art. 13

Recès da lis funziions

1. Si à un recès da lis funziions cuant che un o plui ents a domandin di recedi di une o plui funziions tra chês puartadis indenant in forme asociade de Union daûr di ce che al è previodût tal articul 8.
2. Il recès da lis funziions al è deliberât cu lis stessis modalitâts previodudis pal recès de Union, tant che indicât tal articul 12 di chest Statût.
3. Il recès di une cierte funzion al pues jessi ancje decidût in maniere consensuâl e tal stes moment di bande di ducj i Comuns che a aderivin a la funzion in ogjet.
4. Tal câs di recès di une o plui funziions, si aplichin in ogni câs, cuant che compatibilis, lis disposiziions dal seguitîf articul 14.

Art. 14

Efiets, adempiments e oblics che a derivin di dissioziment, recès, esclusiion

1. Intai câs di dissioziment, recès de Union e recès des funziions, il Diretôr de Union, se al è presint, se no il Segretari Gjenerâl, al predispon un plan là che si da cont dai rapuarts atîfs e passîfs, dai bens e des risorsis strumentâi acuisîts de Union pal esercizi des funziions e si individuin lis eventuâls licuidaziions finanziariis di compensazion tra i ents interessâts su la fonde dai criteris indicâts tai comis seguitîfs. Il plan al è zontât a une convenzion a pueste che e dissipline la aplicazion operative des clausulis ripuartadis tai articui di prime 11, 12, 13.
2. Tal câs di recès, gjavant il câs che a sedin acuardis specifics cjapâts tra il Comun interessât e la Union, il Comun che al recêt:
 - al reste obleât cu la Union pes obligaziions che, tal moment che il recès al è eficaç, no sedin adempidis viers l'ent, tant che a derivin de leç regionâl, dal Statût e dai regolaments de Union, o ben des convenziions e di altris ats di afidament di funziions e compits ae Union;
 - al reste ancje obleât cu la Union par dutis lis obligaziions che a àn di jessi adempidis de Union pal davuelziment di funziions, servizis e ativitâts che il Comun al à afidât a cualsei titul a la Union, par dute la durade di chescj afidaments.
3. Tal câs di recès, il Comun che al recêt al torne te plene titularitât des funziions e dai servizis za conferîts ae Union; chest al è duncje obleât a puartâ a conclusion ducj i procediments in pîts, e ancje ae assunzion di ducj i rapuarts juridics atîfs e passîfs e ai eventuâi contenziôs vignûts fûr che a rivuardin chel stes Comun. Il passaç di competence tra Union e Comuns al ven fat in mût di garantî la continuitât aministrative.
4. Dentre de date di decorence dai efiets dal recès il Comun che al recêt al varà di vê proviodût ae

regolazione di duj i rapuarts finanziariis passifs intai confronts de Union.

5. Tal câs di dissioziment de Union, i Comuns che a fasin part de Union a restin obleâts, intai confronts dai ents o sogjets che a sotentrin intai rapuarts de Union e dome par chescj rapuarts, pes obligazions che, intal moment dal dissioziment, no sedin adempidis viers la Union, tant che a derivin de leç regjonâl, dal Statût e dai regolaments de Union, o ben des convenzions e di altris ats di afidament di funzions e compits ae Union. A restin ancje obleâts, intai confronts dai ents che a sotentrin intai rapuarts de Union e dome par chescj rapuarts, par dutis lis obligazions che a àn di jessi adempidis dal ent che al sotentre pal davuelziment di funzions, servizis e ativitâts che il Comun al à afidât a cualsisei titul a la Union, par dute la durade di chescj afidaments. Infûr che a sedin acuardis tra i Comuns e i ents che a sotentrin, fats par regolâ in maniere diverse i lôr rapuarts daspò dal dissioziment.
6. Intai câs di jessude de Union o di recès des funzions, il Comun che al jes al rinunzie a cualsisei dirit sul patrimoni e demani de Union costituît par mieç di contribûts statâi, regjonâi e provinciâi. Al à dirit invezit ae cuote che i tocje di patrimoni costituît cui contribûts dai Comuns che a aderissin, calcolade daûr dai criteris determinâts de Assemblee. Se il patrimoni nol è par nuie frazionabil o se il frazionament al pues prejudicâ la funzionalitât o la fruibilitât, a àn di jessi concuardadis compensazions specifichis di ripuartâ intal plan indicât tal come 1. Se il ben al è logât dut tal territori dal Comun che al recêt, a chest al è ricognossût il dirit di domandâ il ben stes, cu lis compensazions economicjis oportunis, baste che chest nol sedi funzionâl al davuelziment di funzions che a restin di competence de U.T.I.
7. Il plan indicât tal come 1 al è aprovât de Assemblee de Union e, infûr che tal câs di dissioziment, si perfezione cuntune convenzion scrite tra lis parts interessadis.

TITUL II ORGHINS DI GUVIER

Cjapitul I Normis gjenerâls

Art. 15 Orghins de Union

1. A son orghins de Union Teritoriâl Intercomunâl dal Nadison:
 - a) la Assemblee;
 - b) il President;
 - c) l'Ufici di Presidence;
 - d) il Consei dai revisôrs.

2. A son orghins di guvier de Union chei indicâts tal come 1, letaris a), b) e c). Chescj orghins a son constituîts dome di sindics dai Comuns che a aderissin ae Union, daûr di ce che al è previodût de normative regionâl e di chest Statût, cence coscj gnûfs o plui grancj pe finance publiche.
3. Daûr di ce che al è previodût de normative regionâl, ai components de Assemblee, al President e ai components dal Uffici di Presidence, no puedin jessi conferîts retribuions, gjetons, indenitâts o emoluments scuedûts in cualsisei forme.
4. Ai components de Assemblee, al President e ai components dal Uffici di Presidence al tocje dome un rimbors in relacion a spesis vivis sostignudis pal davuelziment de funzion/cjarie davuelzude/esercitade, documentadis e rindicontadis daûr di ce che al è previodût tal regolament.
5. Cui che al à une cjarie tai orghins di guvier de Union al cesse de cjarie intai câs, cu lis modalitâts e intai tiermins previodûts de normative regionâl, nazionâl e di chest Statût.
6. Il Sindic di ogni Comun che al aderis ae Union al è component di dirit de Assemblee, duncje lis dimissions di component di chest organisim a son cence efjets. Tal câs di impossibilitât a partecipâ a lis sentadis de Assemblee il Sindic al è sostituît volte par volte cuntun assessôr delegât a chest dal Sindic stes. Tal câs di incompatibilitât previodude de normative statâl in vore, la deleghe e pues jessi conferide ancje in vie permanente. E je escludude la sub-deleghe.
7. La decjadence par cualsisei motif de cjarie di Sindic dal Comun e compuarte la decjadence contestuâl de cjarie di component dai orghins di guvier de Union.

Art. 16

Incompatibilitât dai components dai orghins di guvier

1. Lis incompatibilitâts dai components dai orghins di guvier a son determinadis e aciertadis daûr di ce che al è previodût tal TUEL, te normative regionâl e nazionâl, par chel che si puedin aplicâ.
2. Se l'aministradôr declarât incompatibil al è il Sindic che al à la cjarie di President de Union, il President al decjât ancje di cheste cjarie.

Art. 17

Prerogativis e responsabilitâts dai orghins di guvier de Union

1. Lis prerogativis dai components dai orghins di guvier de Union a son disciplinadis des normis in materie di ents locâi.
2. Ai components dai orghins di guvier de Union si aplichin ancje lis normis in vore in materie di responsabilitât previodudis pai orghins dai ents locâi.

Cjapitul II
La Assemblee de Union, il President e l'Ufici di Presidence

Art. 18
Composizion de Assemblee

1. La Assemblee e je costituide di ducj i Sindics dai Comuns che a aderissin ae Union, che a cjapin sù la cjarie di components de Assemblee.
2. Il Sindic, tant che rapresentant dal Comun che al aderis ae Union, al esercite lis sôs funzions tacant de sentade de Assemblee là che e je stade aciertade la assence di incompatibilitât intai siei confronts. La verifiche de incompatibilitât e pues jessi fate ancje in forme coletive.
3. Se la Assemblee de Union e je stade siolte, i gnûfs components de Assemblee a esercitin lis funzions tacant de date di insediament de gnove Assemblee.
4. I components de Assemblee a decjadin cuant che e cesse la lôr cjarie eletive, cun efiet tacant de date de cessazion.
5. Il funzionament de Assemblee, in conformitât ai principis stabilîts in chest Statût, al è disciplinât dal regolament di funzionament de Assemblee, aprovât a maiorance assolude dai components de Assemblee. Chest al previôt, in particolâr, lis modalitâts pe convocazion, pe presentazion e discussion des propuestis, il numar dai components necessaris pe validitât des sentadis e il numar di vôts a favôr necessaris pe adozion des deliberazions, infûr des previsionis diversis indicadis in chest Statût.
6. Fin a la aprovazion dal regolament de Assemblee si apliche, cuant che compatibil, il regolament pal funzionament dal Consei dal Comun di Cividât.

Art. 19
Competencis de Assemblee de Union

1. La Assemblee e je l'orghin di indreçament e di control politic-amministratîf de Union. E esercite lis competencis previodudis de leç cul fin di garantî che la azion dal Ent e rivi ai obietîfs stabilîts intai ats fundamentâi e e controle la lôr atuazion.
2. La Assemblee e je presiedude e convocade dal President de Union.
3. La Assemblee e delibere, in particolâr, a rivuart di chescj ats:
 - a) modificjis dal Statût, cu lis proceduris e lis maiorancis che a coventin pe aprovazion dai statûts comunâi;
 - b) regolaments;
 - c) bilançs anuâi e pluriênai, variazioms relativis, conts consuntîfs;
 - d) ats di programazion e planificazion;

- e) organizazion e concession di servizis publics, afidament di ativitâts o di servizis a mieç di convenzion;
 - f) discipline gjenerâl des tarifis pe fruizion dai bens e dai servizis di competence de Union;
 - g) Plan de Union;
 - h) elezion e sfiducie dal President, e cun di plui elezion e, tai câs previodûts de leç, revoche dal Consei dai revisôrs;
 - i) indreçaments par la nomine, la designazion e la revoche dai rapresentants de Union intai ents, aziendis e istituzions;
 - j) modalitâts di esercizi des formis di control interni;
 - k) acuisçj, alienazions e permutis imobiliârs, costituzion e modificazion di dirits reâi sul patrimoni imobiliâr de Union, apalts e concessions che no sedin previodûts di pueste in altris ats de Assemblee o che no costituissin une lôr semplice esecuzion e che no sedin dentri inte ordenarie aministrazion di funzions e servizis di competence dal Uffici di Presidence o dai orghins burocratics;
 - l) contratazions di mutuis e viertiduris di credit no previodudis di pueste in altris ats de Assemblee;
 - m) ats in materie socioassenziâl e sanitarie previodûts de leç regionâl FVG 6/2006;
 - n) convenzions cun altris Ents locâi;
 - o) partecipazion dal Ent locâl a societâts di capitâi.
4. La Assemblee de Union e vote lis propuestis di deliberazion indicadis tal come 3, letaris a), b), c), d), e), f), g) e l), sintûts i Conseis dai Comuns che a aderissin, che si esprimin cun parê obligatori no vincolant dentri di trente dîs dal riceviment di chestis. Passât chest tiermin, la Assemblee e delibere cence tignî cont dai parês.
5. Tal câs che la aprovazion di un at di chei dal come 3, letaris a), b), c), d), e), f), g) e l), e sedi sometude ae osservance di tiermins no derogabii, il tiermin indicât tal come 4 al è sbassât a vincj dîs.
6. Lis deliberazions indicadis tal come 3 no puedin jessi adotadis in vie di urgjence di altris orghins de Union, infûr di chês che a rivuardin lis variazions di belanç adotadis dal Uffici di Presidence, di presentâ ae Assemblee pe ratifiche intai sessante dîs seguitîfs, se no a decjadin.

Art. 20

Sisteme di votazion de Assemblee

1. La Assemblee e je costituide in maniere valide cu la presince de maiorance assolude dai components tarondade ae unitât superiôr che e rapresenti almancul il 65% de popolazion de U.T.I.
2. Ogni Sindic al esprim inte Assemblee un vôt.
3. L'increment dal numar dai vôts previodût de normative regionâl in relazion al tas di turisticitât al cjate aplicazion tal câs che si produsin lis cundizions indicadis tal art.13, co.3, de L.R. n.26/2014 e s.m.i.

4. Il numar dai vòts esprimûts inte Assemblee di bande dal Sindic di un Comun che al ven fûr di une fusion fate dopo de costituzion de Union, par i prins dîs agns de costituzion dal gnûf ent, al è la sume dai vòts che i singui Comuns fondûts a varessin vût ognidun, daûr di ce che al è previodût dal come 2 se plui favorevul.
5. Lis deliberazions a son cjapadis cul vôt a favôr de maiorance assolude dai components tarondade ae unitât superiôr che e rapresenti almancul il 65% de popolazion de U.T.I.
6. Par ce che nol è previodût di pueste in chest articul e in chest Statût, pes adunancis e pes deliberazions si aplichin lis disposizions indicadis tal regolament di funzionament de Assemblee e, se no son, te normative nazionâl e regionâl in materie di ents locâi.

Art. 21

Sentadis e deliberazions de Assemblee

1. Il Sindic dal Comun cul plui grant numar di abitants al convoche la sentade di insediament de Assemblee e le presiêt fin ae elezion dal President che daspò al assum la presidence.
2. Lis sentadis daspò di chêt di insediament a son convocadis dal President cun comunicazion che e indiche l'ordin dal dì.
3. La sentade e pues jessi di caratar ordenari o urgjent, daûr des previsions dal regolament di funzionament de Assemblee e dal Uffici di Presidence.
4. La Assemblee si da adun e e delibere, di norme, inte sede de Union.
5. La Assemblee e pues dâsi adun e deliberâ in ogni Comun che al aderìs ae Union.
6. Il President al scuën convocâ la Assemblee, dentri di un tiermin di no plui di vincj dîs, cuant che lu domandin un cuint tarondât ae unitât superiôr dai membrìs de Assemblee che a rapresentin almancul un cuint de popolazion, metint dentri tal ordin dal dì i ogjets domandâts di chescj tal câs che a sedin di competence de Union.
7. Il President al garantìs une informazion adeguade e preventive ai components de Assemblee su lis cuistions presentadis ae Assemblee stesste clamantle adun cul elenc dai arguments tal ordin dal dì, almancul cinc dîs prime de zornade fissade pe sentade. Tal câs di urgjence la convocazion e à di jessi fate cuntun preavîs di almancul 24 oris.

Art. 22

Dirits e dovês dai components de Assemblee

1. I components de Assemblee a àn il dirit di presentâ al President interrogazions, interpelancis, mozions e propuestis di deliberazion par ce che al rivuarde la ativitât de Union.
2. I components de Assemblee a àn il dirit di otignî dai uficis de Union dutis lis notiziis e lis informazions

utilis pal compiment dal lôr mandât.

Art. 23

Il President de Union

1. Il President de Union al è elet de Assemblee cul vôt favorevul de maiorance assolude dai components, tarondade ae unitât superiôr che e rapresenti almancul il 65% de popolazion de U.T.I. te prime sentade de Assemblee.
2. Il President al è il rapresentant legâl de Union e al pues stâ in judizi, cence necessitât di autorizazion, tant che atôr o ben clamât in cause.
3. In particolâr il President de Union:
 - a) al nomine il Vicepresident e i components dal Uffici di Presidence e al pues revocâju;
 - b) al convoche e al presiêt la Assemblee e l'Uffici di Presidence e al dirêç i lavôrs e lis ativitâts;
 - c) al nomine il Diretôr, se al è previodût, e al pues revocâlu;
 - d) al supervisione il funzionament dai uficis;
 - e) al conferîs lis incarghis dirigenziâls;
 - f) al nomine i responsabii dai uficis e dai servizis;
 - g) al nomine i rapresentants de Union intai ents, aziendis e istituzions;
 - h) al nomine il Segretari de Union;
 - i) al supervisione e al vuardie la ativitât complessive de Union, promovint, se al covente, indagjins e verificchis;
 - j) al compîs i ats che i son demandâts de leç, dal Statût e dai regolaments;
 - k) al vigjile su la osservance dai indreçaments dal Uffici di Presidence pe realizazion dai programs e l'otigniment des finalitâts de Union.
4. Il President al reste in cjarie par trê agns e al pues jessi sfiduciât de Assemblee. In chest câs, fin al insediament dal sucessôr, lis funziions dal President a son esercitadis dal Sindic dal Comun cul numar plui grant di abitanti, diviers dal President sfiduciât, che al convoche la Assemblee pe elezion dal gnûf President.
5. Il President al pues jessi sfiduciât de Assemblee cuntune mozion aprovade cul vôt favorevul de maiorance assolude dai components, tarondade ae unitât superiôr che e rapresenti almancul il 65% de popolazion de U.T.I.. La mozion e à di jessi motivade, sotscribe di almancul un cuint dai membris de Assemblee tarondade ae unitât superiôr che a rapresentin almancul un cuint de popolazion de U.T.I. e metude in discussion no prime di cinc dîs e no dopo di dîs dîs de sô presentazion. La mozion, se e je aprovade, e compuarte la decjadence ancje dal Uffici di Presidence.
6. Tal câs di decjadence de cjarie di component de Assemblee, il President al decjât de incarghe. Nol è considerât cessât de cjarie il Sindic tornât a elei.
7. Il Vicepresident al sostituîs il President tal câs di assence o impediment. Tal câs di cessazion

anticipade de cjarie, il Vicepresident al esercite lis funzions dal President fin ae gnove elezion. Tal câs di assence o impediment ancje dal Vicepresident, lis funzions a son esercitadis dal component de Assemblee plui vieli.

8. Il President al pues delegâ al Vicepresident, a singui components de Assemblee o a singui components dal Uffici di Presidence ambits specifics di ativitâts.

Art. 24

Ufici di Presidence

1. L'Ufici di Presidence al à funzions esecutivis e al davuelç dutis lis funzions che no son atribuidis dal Statût al President e a la Assemblee.
2. L'Ufici di Presidence al è componût dal President de Union, che lu presiêt e al coordene lis ativitâts, e di un numar di components che nol sedi plui di cinc.
3. I components dal Uffici di Presidence a son nomenâts dal President tra i components de Assemblee dentri di 10 dîs de jentrade in cjarie. I providiments di nomine e revoche a son comunicâts ae Assemblee te prime sentade che e ven.
4. L'Ufici di Presidence al colabore cul President de Union pal guvier dal Ent e pe atuazion dai indreçaments gjenerâi de Assemblee e al opere cun deliberazions colegjâls.
5. L'Ufici di Presidence al riferis an par an ae Assemblee su la sô ativitât e al davuelç ativitâts propositivis e di sburt intai confronts di cheste. L'Ufici di Presidence al da ancje atuazion a lis deliberazions de Assemblee.
6. L'Ufici di Presidence al predispon la relazion previsionâl e programatiche e il scheme di Belanç Anuâl e Plurienâl di presentâ ae Assemblee pe aprovazion.
7. In câs di urgjence l'Ufici di Presidence al adote lis deliberazions che a rivuardin lis variazions di belanç di fâ ratificâ de Assemblee dentri di sessante dîs, se no a decjadin. L'Ufici di Presidence al dispon i prelêfs dal font di riserve e al da comunicazion ae Assemblee inte prime sentade che e ven.
8. Il President al afide ai singui components dal Uffici di Presidence il compit di supervisionâ un particulâr setôr de aministrazion o projjets specifics.
9. Il component dal Uffici di Presidence al decjât par vie de cessazion de cjarie tal Comun.
10. Lis modalitâts di convocazion e di funzionament dal Uffici di Presidence a son stabilidis cun ats di auto organizazion.

Art. 25

Comissions intercomunâls

1. Il President, su propueste de Assemblee, al istituîs comissions intercomunâls componudis di

conseîrs dai Comuns comprendûts inte Union cun funzions consultivis a supuart de ativitât de Assemblee stesse.

2. La composizion e lis modalitâts di funzionament des comissions intercomunâls a son definidis tal at propositîf de Assemblee.

TITUL III

ORGANIZAZION E AMINISTRAZION

Art. 26

Principis gjenerâi

1. La ativitât amministrative de Union si davuelç tal rispiet dal principi di distinzion tra compits politics di indreçament e di control, risiervâts ai orghins di guvier de Union, e compits di gjestion tecniche, amministrative e economiche-finanziarie, risiervâts al aparât gjestionâl, daûr de discipline di leç in vore.
2. L'asset organizatîf de Union al è impuestât par otignî standard di erogazion di cualitât, in tiermins di eficacie, sveltece, efience e economicitât de azion amministrative.
3. La organizazion dai uficis e dai servizis si articole in struturis operativis organizadis di mût di garantî l'esercizi plui efiçaç des funzions che ur son atribuidis e daûr dal principi di strumentalitât rispiet al otigniment dai obietîfs stabilîts de amministrazion.
4. La organizazion des struturis e la gjestion dal personâl a àn la finalitât di otignî nivei miôr di efience, di eficacie e funzionalitât, daûr dai principis di economicitât, flessibilitât e adatabilitât in rapuart a lis funzions e ai compits esercitâts.

Art. 27

Organizazion dai uficis e dai servizis

1. Il regolament pal ordenament dai uficis e dai servizis al definìs lis regulis di organizazion de Union, specificant lis finalitâts e lis carateristichis essenziâls dai rûi di direzion e determinant lis responsabilitâts atribuidis ai responsabii dai servizis.

Art. 28

Personâl de Union

1. La Union e proviôt ae determinazion dal so asset organizatîf, e cun di plui ae gjestion dal personâl intal ambit de sô autonomie normative, organizative e finanziarie, daûr dai principis stabilîts de leç e

dal Statût.

2. Il personâl de Union al è costituît dai dependents dai Ents che a aderissin, distacâts, comandâts o trasferîts ae Union stesse, dal personâl trasferît de Provincie, de Regjon, de Comunitât Montane o di altris ents e, tal câs di dibisugne, di personâl cjolt daûr de normative in vore.
3. Al personâl de Union si apliche la normative in vore pal personâl dai ents locâi.
4. Il personâl dai Comuns e des Provinciis al è trasferît in maniere progressive ae Union daûr des decorencis dal exercizi des funzions trasferidis.
5. Il personâl trasferît al conserve il tratament in vore tal moment dal trasferiment, infûr des indenitâts o retribuions di funzion o posizion coreladis a rûi o incarics esercitâts prime.
6. La programazion dal dibisugn dal personâl, in plui rispjet a chel inserît in maniere stabile te dotazion organiche, e à di jessi fate dopo di un acuardi di program cui Comuns che a aderissin, se la programazion e rivuarde la metode a disposizion di personâl dai Comuns.
7. I aspiets contratuâi a son regolâts dai acuardis definîts de contratazion coletive dal compart unic dal implei public regjonâl e locâl dal Friûl Vignesie Julie.
8. I dependents de Union a puedin operâ ancje in lûcs diviers de lôr sede, baste che a sedin comprendûts intal ambit dal teritori de Union stesse.

Art. 29

Avalêsi di unitâts organizativis comunâls

1. La Union e pues avalêsi, pal davuelziment di funzions a nivel decentrât tal teritori (comunâl e sub-comunâl), di unitâts organizativis comunâls, cul assens e cul acuardi operatîf dal comun interessât.

Art. 30

Diretôr de Union

1. La Union, pe sô dimension e complessitât organizative, e pues previodi inte proprie organizazion la figure dal Diretôr che al è orghin di responsabilitât manageriâl cu la competence pe ativitât di gjestion pe atuazion dai indreçaments programatics e dai obietîfs individuâts dai orghins di guvier de Union.
2. La incarghe di Diretôr e je conferide dal President, par une durade no in plui di chês dal so mandât, daspò di une selezion, cun contrat di lavôr a timp indeterminât di dirit privât a un dirigjent de Union o a un altri dirigjent dal compart unic dal implei public regjonâl e locâl o a un dai segretaris comunâi o provinciâi in servizi tai ents locâi dal teritori regjonâl.
3. Se nol è pussibil conferî la incarghe cu lis modalitâts indicadis tal come 2, cheste e je conferide, daspò di une procedure a evidence publice, cun contrat di dirit privât a timp determinât, a un sogjet che al vedi il diplome di lauree almancul cuadrienâl e esperience professionâl almancul cuincuenâl

adate aes funziuns di davuelzi, maduride in cualifichis dirigjenziâls intes aministrazions publichis, ents di drit public o privât, o cun ativitâts professionâls pertinentis cu lis funziuns di davuelzi.

4. La incarghe di Diretôr e je a timp plen, rinovabile e revocabile. Il Diretôr al continue a esercitâ lis sôs funziuns fin ae nomine dal so sucessôr.
5. Il President al pues procedi ae revoche de incarghe dal Diretôr, sintût l'Ufici di Presidence, tal câs di no otigniment dai obietîfs fissâts, o tal câs di inosservance des diretivis, tal rispiet dal principi dal contraditori.
6. Il regolament pal ordenament dai uficis e dai servizis al dissipline lis modalitâts di revoche, di valutazion dai risultâts e dut ce che nol è disciplinât des leçs e dal Statût.

Art. 31

Il Segretari Gjenerâl

1. La Union e à un Segretari Gjenerâl, sielzût dal President tra i Segretaris Comunâi dai Comuns che a apartegnin ae Union, che al manten dutis dôs lis funziuns.
2. Il Segretari Gjenerâl de Union al davuelç dutis lis funziuns atribuidis dal ordenament in materie di ents locâi al Segretari intai Comuns.
3. Il Segretari Gjenerâl al pues jessi revocât dal President de Union, daspò di une deliberazion dal Ufici di Presidence, par violazions gravis. La durade de incarghe no pues jessi in plui di chê dal mandât dal President de Union e dal servizi tant che segretari comunâl intai Comuns che a apartegnin ae Union.
4. La incarghe e pues jessi rinovade.
5. Tal câs di assence o impediment dal Segretari Gjenerâl, chest al è sostituît di un dai altris segretaris dai Comuns che a aderissin ae Union.

Art. 32

Titulârs di posizion organizative

1. I titulârs di posizion organizative a son individuâts tra lis figuris plui in alt comprendudis te categorie D des areis di ativitâts indicadis tal regolament di organizazion dai uficis e dai servizis.
2. Chescj a proviodin ai ats di gjestion de ativitât de Union pe atuazion dai indreçaments e dai obietîfs definîts tal document programatic de Aministrazion, organizant i uficis e i servizis che ur son stâts assegnâts daûr des diretivis dadis dal Diretôr, se nomenât, o dal Segretari Gjenerâl, che i rispuindin in maniere direte dal lôr operât e dal risultât otignût.

Art. 33

Colaborazioni esternas

1. Il regolament al pues previodi colaborazioni esternas, cun rapuart di lavôr autonom par obietîfs determinâts e cun contrats a tiermin, tal rispiet de normative in vore.
2. Lis normis regolamentârs pal conferiment des incarghis di colaborazion a sogjets fûr de aministrazion a àn di stabilî la durade, l'ogjet e i criteris pe determinazion dal compens.

TITUL IV

ISTITÛTS DI PARTECIPAZION E DIRITS DAI CITADINS

Art. 34

Partecipazion popolâr e acès

1. Ai citadins e ai residents tai Comuns che a aderissin, la Union e garantis il dirit di partecipâ ae formazion des sieltis politichis-aministrativis, daûr dai principis e des formis stabilidis dal regolament specific.
2. La Union e ricognòs ancje il dirit dai interessâts, dai utents, des formazions sociâls e des associazions e comitâts titulârs di interès coletîfs, di vê part ae determinazion dal indreçament, atuazion e control des ativitâts metudis in vore de Aministrazion. Par cheste finalitât la Assemblee de Union e pues istituî des consultis a pueste, providint cu la stesse deliberazion a definî i compits e il funzionament.
3. La Union e fâs diventâ efetîf il dirit ae partecipazion politiche-aministrative, garantint l'acès aes informazions e ai ats dal ent e dant une informazion complete su la sô ativitât.
4. Il regolament al dissipline, in particolâr, lis modalitâts di efetuazion dal referendum consultîf, i câs di escluson e lis formis di iniziativis popolârs.
5. La partecipazion popolâr si esprim cu la incentivazion des formis associativis e di voluntariât e il dirit dai singui citadins di intervignî tal procediment aministratîf.

Art. 35

Dirit di informazion e di acès ai ats e partecipazion al procediment

1. La Union e ricognòs che la informazion su la sô ativitât e je cundizion essenziâl par rivâ a lis sôs finalitâts. Par garantî la transparence de sô azion la Union e fâs publics, se a son disponibii, par mieç de stampe e/o cun altris struments di informazion o comunicazion di masse ducj i dâts utii che a rivaardin:

- a) l'ûs des risorsis assegnadis a cheste;
 - b) la valutazion de eficiencie e eficacie dai servizis;
 - c) i criteris e lis modalitâts di acès a lis funzions o ai servizis gjestîts de Union.
2. Par cheste finalitât, cuntun regolament, e discipline lis proceduris di acès ai siei ats e documents aministratîfs che no sedin za metûts daurman a disposizion daûr dal come precedent.
 3. La Assemblee de Union cul stes regolament e discipline la partecipazion dai citadins e dai interessâts intai procediments aministratîfs di sô competence, tal rispiet de normative detade in materie pai ents locâi e promovint l'acès informatic ae sô documentazion.

Art. 36

Sportel pal citadin

1. Cu la finalitât di garantî il mantigniment dal rapuart diret cui citadins, la acessibilitât direte ai servizis e la miôr fruibilitât di dutis lis funzions e i servizis esercitâts de Union, cheste e garantis, in colaborazion cui Comuns che a aderissin, la organizazion intal Uffici pes relacions cul public di ogni Comun di une strutture clamade "Sportel pal citadin" cun funzions informativis e di racuardi.
2. Pal exercizi des funzions dal "Sportel pal citadin" al è doprât il personâl za intal organic dai ents interessâts cun competencis linguistichis adatis cul fin di fâ diventâ efetîfs e atuabii i dirits che a tocjin ae minorance linguistiche slovene e furlane.

Art. 37

Ufiscis decentrâts

1. La Union e pues ativâ, intai singui Comuns che a aderissin, Ufiscis decentrâts in relazion aes funzions e ai servizis esercitâts de Union in maniere direte o par deleghe dai Comuns che a aderissin.

TITUL V

GJESTION, FINANCE E CONTABILITÂT

Art. 38

Principis gjenerâi

1. La Union e fâs la sô ativitât cun autonomie gjestionâl, finanziarie, contabile e patrimoniâl, fasint riferiment a criteris di eficacie, eficiencie e economicitât.
2. Ae Union si aplichin lis normis regjonâls in materie e, par chel che a son aplicabii, i principis e lis

normis sul ordenament finanziari e contabil dai Comuns indicâts tal TUEL, e ancje i principis di coordinament de finance publiche detâts dal Stât, che a son indreçâts a lis unions stessis o ai ents locâi.

3. Il regolament di contabilitât al discipline, tal rispiet de leç, la gjestion finanziarie, economiche e patrimoniâl de Union, la revision economiche-finanziarie, il consei dai revisôrs, il control di gjestion, il plan strategjic, il servizi di tesorerie e il servizi di economât.

Art. 39

Financis de Union

1. La Union e à autonomie finanziarie, tal ambit des leçs su la finance publiche locâl, fondade su la ciertece des risorsis propriis e trasferidis.
2. Lis jentradis de Union a son, in particolâr, costituidis di:
 - a) risorsis assegnadis de Regjon ae Union destinadis al funzionament e ae gjestion dai servizis, al svilup dai investiments e al finanziament des funzions trasferidis o delegadis;
 - b) trasferiments dai ents che a aderissin, in relazion a lis funzions e ai servizis atribuîts ae Union daûr di ce che al è indicât tal come 3;
 - c) jentradis che a rivin des tassis, des tarifas, des sanzions amministrativis e dai contribûts sui servizis afidâts a cheste;
 - d) incentîfs regjonâi previodûts des leçs di setôr;
 - e) altris contribûts eventuâi e trasferiments dal Stât, de Regjon e di altris Ents;
 - f) renditis patrimoniâls;
 - g) impiament di prestits;
 - h) prestazions par cont di tierçs;
 - i) cuotis di partecipazion dai utents;
 - j) altris jentradis o erogazions disponudis a cualsisei titul a pro de Union, comprendûts ancje i las e lis donazions.
3. La Union e ricêf dai Comuns che le costituissin:
 - a) trasferiments ordenaris, che a coventin par contribuî al finanziament des spesis di funzionament de Union, atribuîts an par an a cheste e sogjets a rivalutazion;
 - b) trasferiments specifics, che a coventin par finanziâ lis funzions delegadis in maniere volontarie dai Comuns ae Union.I trasferiments indicâts tes letaris a) e b) a son definîts dai singui Comuns cuntune deliberazion dal Consei.
4. Cuntun regolament a pueste e sarà definide la discipline che no je previodude de leç e di chest Statût che e rivuarde i rapuarts tra Comuns che a aderissin e Union, in particolâr i criteris di ripart dai coscj che a rivuardin i servizis.

Art.40
Consei dai revisôrs

1. La Assemblee de Union e nomene il Consei dai revisôrs daûr des modalitâts stabilidis de leç.
2. Il Consei dai revisôrs al reste in cjarie trê agns e si pues rinovâ une volte sole.
3. L'orghin di revision al colabore cu la Assemblee te sô funzion di control e indreçament, al esercite la vigjilance su la regolaritât contabile, finanziarie e economiche de gjestion dal ent e al ateste la corrispondence dal rindicont cu lis risultancis de gjestion, redizint une relazion a pueste, che e acompagne la propueste di deliberazion assembleâr dal rindicont dal bilanç.
4. Inte relazion indicade tal come 3 l'orghin di revision al fâs rilêfs e propuestis che a smicjin a otignî une miôr efficienze, produttivitât e economicitât de gjestion.
5. Il Consei dai revisôrs al pues davuelzi lis sôs funksions ancje a favôr dai Comuns che a apartegnin ae U.T.I. che a domandin di avalêsi dal so operât.

Art. 41
Tesorie

1. Il servizi di tesorie de Union al cjape dentri:
 - a) la riscossion di dutis lis jentradis di partignince de Union, versadis dai debitôrs su la fonde di ordins di incàs e listis di caric e dal concessionari dal servizi di riscossion dai tribûts;
 - b) la riscossion di cualsei altre sume che i tocje, che il tesoriâr al scuen dâ comunicazion di cheste ae Union dentri di 5 dîs;
 - c) il paiament des spesis ordenadis cun mandâts di paiament, intai limits dai stanziaments di bilanç e dai fonts di casse a disposizion;
 - d) il paiament, ancje se a mancjin i mandâts relatîfs, des ratis di amortament dai mutuis, dai contribûts previdenziâi e des altri sumis stabilidis de leç.
2. Il servizi di tesorie de Union al è afidât cuntune procedure a evidencee publiche, tal rispjet de normative in vore in materie.
3. I rapuarts cul tesoriâr a son regolâts de leç, dal regolament di contabilitât e ancje di une convenzion a pueste.

Art. 42
Plan strategjic de Union

1. Il Plan de Union al è il strument partecipatîf di programazion e planificazion che al assegne ae

aministrazion de Union i obietîfs prioritâris di smicjâ, individuand tîmps e modalitâts di realizazion.

2. Il Plan de Union al à une durade trienâl e al cjape dentri il contignût dal document unic di programazion indicât tal articul 170 dal decret legjislatîf 267/2000.
3. Il Plan de Union al è aprovât dentri dal tiermin stabilît de leç pe aprovazion dal bilanç di prevision.
4. La relazion anuâl su la atuazion dal Plan de Union e je aprovade de Assemblee dentri dal tiermin previodût de leç pe aprovazion dal rindicont di gjestion; i Conseis dai Comuns che a aderissin a esprimin il lôr parê dentri dai sessante dîs seguitîfs.

Art.43

Control di gjestion

1. Cu la finalitât di garantî la realizazion dai obietîfs programâts, la gjestion des risorsis publichis in maniere corete e economiche, la imparzialitât e il bon andament de aministrazion publiche e la transparence de azion amministrative, la Union e apliche il control di gjestion daûr des modalitâts stabilidîs de leç. Intal regolament di contabilitât a son detadis normis specifichis che a disciplinin lis formis e lis modalitâts dal control di gjestion.

TITUL VI

NORMIS TRANSITORIIS E FINÂLS

Art. 44

Regolaments

1. Gjavant il câs che al sedi previodût in maniere diverse, i regolaments de Union a son aprovâts de Assemblee cul vôt favorevul de maiorance assolude dai components, tarondade ae unitât superiôr, che e rapresenti almancul il 65% de popolazion de U.T.I.
2. Fin ae adozion di regolaments propriis la Union si avâl, se compatibii, dai regolaments dal Comun di Cividât.

Art. 45

Rimant

1. Par ce che nol è previodût in chest Statût, si rimande ae normative statâl e regionâl in materie di ordenament dai ents locâi.